

Evening Dogri (NSD) News

08-August. - 2026

खास खबरां

1. प्रधानमंत्री नरेन्द्र मोदी होरें आखेआ जे भारत सेमीकंडक्टर अंतरिक्ष ते ड्रोन जनेह क्षेत्रें च आत्मनिर्भर बनने दी दिशा च तेजिया कन्नै अगड़े बधै करदा ऐ।
2. केन्द्री सहकारिता मंत्री अमित शाह होरें अज्ज मुम्बई च NUCFDC दे नमें परिसर दा उदघाटन कीता- महाराष्ट्र दे मुख्मन्त्री हुंदे कन्नै BSF इंटरनैशनल कन्वेंशन च बी हिस्सा लैता।
3. भारत नै गैर जीवाश्म ईंधन पर आधारित बिजली पैदा करने दी छमता च 300 गीगावाट दा एतिहासिक आंकड़ा पार करी लैता ऐ।
4. झारखंड सरकार ते प्रदर्शनकारी विद्यार्थियों बश्कार दुए गेड़ दी गल्लबात सकारात्मक महौल च सम्पन्न होई- गेई ऐ- पर अजें कोई ठोस नतीजा सामने नैई आया।
5. हिमाचल प्रदेश दे चम्बा च बस हादसा- 7एं दी मौत 11 जख्मी- राष्ट्रपति ते प्रधानमंत्री होरें हादसे पर दुख प्रगट कीता।
6. भारतीय बैडमिंटन खडारन अश्मिता चालिहा कोरिया मासटर्स सुपर 300 टूर्नामेंट दे फाइनल च पुज्जी गेई।

<><><><><><>

PM-IIT Delhi

प्रधानमंत्री नरेन्द्र मोदी होरें अज्ज भारतीय प्रौद्योगिकी संस्थान IIT दिल्ली दे विद्यार्थियों गी आग्रह कीता ऐ कि ओ अपने फैसलें च राष्ट्र-हित गी सम्भनें शा उप्पर रखन ते अपने-आपै गी पुच्छन जे उन्दे कम्में नै देसै गी किस चाल्ली फैयदा पुज्जी सकदा ऐ। एह गल्ल प्रधानमंत्री होरें अज्ज IIT दिल्ली दे 57में दीक्षांत समारोह गी सम्बोधित करदे होई आक्खी। मोदी होरें आखेआ जे हर पीढ़ी अपने दौर दिएं टकोहदी चनौतिएं दा सामना करदी ऐ ते अपनी राष्ट्री जिम्मेदारिएं गी निभांदी ऐ। उ'नें आखेआ जे बी.ए सतह दी पढाई करने आहलें विद्यार्थियों आसेआ अगले 30-35 बरे च कीते जाने आहले कम्में कन्नै दिश दे विकसत भारत दे रस्ते पर अगड़े बधने पर महत्वपूर्ण असर पौग। प्रधानमंत्री मोदी होरें आखेआ कि मुल्यै च केई नमें क्षेत्र उभरिएं सामने आवा करदे न जेहड़े नौजोआनें गी नमें मौके प्रदान करा'करदे ना। उ'नें सेमीकंडक्टर, अंतरिक्ष ते ड्रोन जनेह क्षेत्रें दी मसाल दिंदे होई आखेआ जे भारत सम्भनें क्षेत्रें

च आत्मनिर्भर बनने दी दिशा च कम्म करा करदा ऐ। मोदी होरें आखेआ कि आत्मनिर्भर दी एह पैहल विकसित भारत दे निर्माण लेई इक निगगर बुनियाद दा कम्म करोग।

<><><><><><>

Amit Shah -Mumbai

केन्द्री गृह ते सहकारिता मंत्री अमित शाह होरें अज्ज मुम्बई दे फोर्ट इलाके च राश्ट्रीय शैहरी सहकारी वित्त ते विकास निगम NUCFDC दे नमें दफ्तर परिसर दा उदघाटन कीता। शाह होरें केई सरबन्धित सेवाएं दी बी शुरूआत कीती। इस मौके उनें “जोखम प्रबन्धन ते लचीलापन” विषय पर इक कॉफी टेबल बुक दा बी विमोचन कीता। एहदे इलावा उनें 6 सहकारी बैंके दे प्रतिनिधियें गी उन्दी शानदार कारकरदगी लेई सम्मानित बी कीता। इस मौके पर NUCFDC ते राश्ट्रीय फोरेसिक विज्ञान युनिवर्सिटी बश्कार इक समझोता पत्र पर दस्तख्त बी कीते। एह सहयोग शैहरी सहकारी बैंकिंग क्षेत्र च साइबर सुरक्षा, तकनीकी छमताएं ते संस्थागत छमताएं गी निगगर बनाने च मती महत्वै आहली भूमिका निभागा। मगरा शाह होरें महाराष्ट्र दे मुख्मन्त्री देवेन्द्र फडनवीस हुंदे कन्नै BSF इंटरनैशनल कन्वेंशन सेंटर च हिस्सा लैता ते शैहरी सहकारी बैंके गी साइबर सुरक्षा गी निगगर बनाने लेई इक सुरक्षा संचालन केन्द्र दा बी उदघाचन कीता।

<><><><><><>

PM-Nadda Article

प्रधानमंत्री नरेन्द्र मोदी होरें अज्ज केन्द्री सेहत मंत्री जे.पी नड्डा हुंदा इक लेख सोशल मीडिया पर सांझा करदे होई आखेआ कि एह लेख भारत दा विस्तार करा'रदे आत्मनिर्भर चिकित्सा प्रोद्योगिकी तंत्र गी उजागर करदा ऐ, जेहड़ा घरेलू उत्पादन, विनिर्माण, आयात च कमी ते उत्पादन कन्नै जुड़ी दी प्रोत्साहन योजना ते मैडिकल डिवाइस जनेही पैहलकदमियें गी होर अगड़े लेई जा'करदा ऐ। प्रधानमंत्री होरें आखेआ कि इस लेख च सेहतमंत्री होरें इस गल्लै दा चेचे तौरा पर जिक्र कीते दा ऐ कि भारत चिकित्सा तंत्र दे क्षेत्र च, पूरी दुनिया च इक भरोसेमंद भ्याल दे तौरा पर उभरियै सामने आवा करदा ऐ।

<><><><><><>

Nadda -CEO Round Table

केन्द्री सेहत ते परोआर कल्याण मंत्री जे.पी. नड्डा होरें अज्ज नमीं दिल्ली च आयोजित इंडिया मैडिकल डिवाइस कांफ्रेंस 2026 च CEO गोलमेज सम्मेलन दी अध्यक्षता कीती। अपने इक सोशल मीडिया पोस्ट च नड्डा होरें दस्सेआ कि इस गोलमेज सम्मेलन च उद्योग जगत दे प्रमुख प्रतिनिधिएं ते वरिष्ठ अधिकारिएं हिस्सा लैता ते इस दौरान नवाचार, घरेलू निर्माण, मूल-श्रृंखला, बजारें तगर पुज्ज ते निर्यात गी मजबूत बनाने लेई इक व्यापक नजरिए पर तफसीली विचार-बटांदरा कीता गोआ, तां जे भारत गी म्यारी चिकित्सा उपकरणें दे इक वैश्विक केन्द्र दे रुपै च पंछान दोआई जाई सकै। सेहत मंत्री होरें इस गल्लै पर जोर दिता कि प्रधानमंत्री हुंदे नेतृत्व च सरकार मकाबलेबाजी आहले, नवाचार कन्नै चलने आहले ते विश्व सतह पर एकीकृत Med-Tech- Eco System दे निर्माण लेई उद्योग जगत कन्नै मिलियै कम्म करने लेई तयार ते वचनबद्ध ऐ।

<><><><><><>

India Energy

भारत ने गैर जीवाश्म ईंधन पर आधारित बिजली पैदा करने दी छमता च 300 गीगा वाट दा ऐतिहासिक आंकड़ा पार करी लैता ऐ। नमीं ते परती-परतियै बरती जाई सकने आहली ऊर्जा सरबन्धी केन्द्री मंत्री प्रहलाद जोशी होरें इस बारे इक सोशल मीडिया प्लेटफार्म पर घोषणा करदे होई दस्सेआ जे पिच्छले 12एं बरे च मुख्य च स्वच्छ ऊर्जा छमता च 400 प्रतिशत दा जबरदस्त बाद्दा दर्ज कीता गोआ ऐ जेहड़ा जे इस अरसे च 75 गीगावाट कोला बधियै 300 गीगावाट कोला उप्पर पुज्जी गोआ ऐ। उंनै दस्सेआ जे भारत च छड़ी सौर ऊर्जा छमता गै 165 गीगावाट कोला मती होई गेई ऐ जिसलै के हवा यानि पवन ऊर्जा दी स्थापित छमता 58 गीगावाट कोला मती ऐ। इस रफ्तार कन्नै मेद ऐ जे भारत 2030 तगर 500 गीगावाट छमता कोला बी अगड़े बधी जाहग।

<><><><><><>

Jharkhand-Talks

झारखंड सरकार ते प्रदर्शनकारी विद्यार्थियें बश्कार दुए गेड़ दी गल्लबात सकारात्मक महौल च सम्पन्न होई गेई ऐ- पर भर्थी मतेयाने च गड़बड़ी आहले मुख मुद्दें पर फिलहाल कोई ठोस नतीजा सामने नैई आया ऐ जेहदे कारण विद्यार्थियें अपना आंदोलन जारी रखने दा फैसला लैता ऐ।

रांची च अज्ज लग्गी दी इस बैठका च JPSC ते JSSC अकांक्षी न्यायमंच दे 8 मित्बरी प्रतिनिधिमंडल ने सरकार आसेआ खडेरी गेदी मंत्रियें दी विशेष समीति कन्नै मलाटी कीती । एहदे शा पैहले कल गल्लबात दा पैहला गैड लग्गा हा। अज्जै दी गल्लबात च विद्यार्थियें 14मीं JPSC सिविल सेवा दा प्रिलिमिनरी म्तेहान रद्द करने- होई दिएं गड़बड़िं दी CBI जां साबका जजें कोला जांच करने ते मजूदा म्तेहान बवस्था च बदलाव आहन्ने दी मंग रखी ही। सरकार आसेआ खडेरी गेदी कमेटी नै इनें मंगें पर अपनी तरफा कोई प्रतिक्रिया ते नैई दिती पर एह जरूर आखेआ कि उन्दे सुझाएं गी मुखमन्त्री हुंदे अगगे रखेआ जाहग।

<><><><><><>

CII-MP

प्रधान न्यायधीश जस्टिस सूर्यकांत होरें आखेआ ऐ कि न्याय धोड़ी पुज्ज गल्लबात कन्नै शुरु होंदी ऐ ते लोकें दिएं खास समस्याएं दे साब्वै उन्दा नबेड़ा कीता जाना लोड़चदा। अज्ज इंदौर च वेस्ट ज़ोन रीजनल कांफ्रेंस गी सम्बोधित करदे होई उ'नें एह गल्ल आक्खी जेहदा विषय हा- “न्याय तगर पुज्ज बधाना”। उ'नें आखेआ जे बक्ख-बक्ख समुदायें दिएं शकैतें ते परेशानियें गी उन्दी मकामी भाषा जां बोली च सुनेआ जाना लोड़चदा। कार्यक्रम गी सम्बोधित करदे होई मध्य प्रदेश दे मुखमन्त्री मोहन यादव होरें आखेआ जे आधुनिक तकनीकें दी वजह कन्नै न्याय बवस्था च केई बदलाव आए न। उ'नें आखेआ कि प्रधानमन्त्री नरेन्द्र मोदी हुंदे नेतृत्व ते दूरै दी सोच कन्नै सदिए पराने ते गैर-जरूरी कनूने दी थाहर नमें कनून आंदे ते लागू कीते गेन।

<><><><><><>

India-UN Soodan

भारत न सूडान च शिक्षा क्षेत्र दे बुनियादी ढांचे गी नशाना बनाने आहलें खलाफ तुरत कुलसंसारी सतह दी कारवाई करने ते सख्त जवाबदेही दी मंग कीती ऐ। सूडान च संघर्ष दे कारण पिच्छले 3 बरे च इक करोड़ 70 लक्ख कोला मते बच्चें स्कूल जाने थमां महरुम होई गेन। न्यू-यार्क च सूडान च शिक्षा दी रक्षा: शांति, नवनिर्माण ते स्थिरता च निवेश योगदान विषय पर आयोजित आरिया-फार्मूला बैठक च भारतीय संयुक्त राष्ट्र परामर्शदाता एल्डोस मैथ्यू पुन्नूसे होरें संघर्ष आहले क्षेत्रें च बच्चें दे शिक्षा दे अधिकार दी रक्षा लेई भारत दी वचनबद्धता गी फही पक्का कीता। एह बैठक सोमालिया, कांगो आसेयआ आयोजित कीती गेदी ही। संयुक्त राष्ट्र दे आंकड़े दा हवाला दिंदे होई पुन्नूसे होरें आखेआ कि सूडान च स्कूलें पर हमले च 57 प्रतिशत दा बाद्दा होआ ऐ। उ'नें इस गल्लै पर चेचे तौरा पर जोर दिता जे जवाबदेही दे बिजन सुरक्षा दा कोई असर नैई होई सकदा।

White House -Trump

अमरीका दे राष्ट्रपति डोनाल्ड ट्रम्प होरें व्हाइट हाउस परिसर च इक नमां बालरुम ते सैन्य परिसर बनाने दी योजना दा बचाव कीता ऐ। उ'नें व्हाइट हाउस दी छत पर बने दे ड्रोनपोर्ट गी इक महत्वपूर्ण सैनिक सम्पति दस्सेआ। राष्ट्रपति ट्रम्प होरें अपने सोशल मीडिया पर प्रस्तावित ढांचे दा इक फोटू सांझा कीता ऐ। ट्रम्प हुंदा एह ब्यान निर्माण परियोजना गी लेइयै चलै करदे कनूनी मकददमें दी बछोकड़ै च आया ऐ। इक संघीय अपील अदालत नै प्रस्तावित व्हाइट हाउस Ball Room पर कम्मै गी रोक दीता ऐ। राष्ट्रपति ट्रम्प होरें अदालत दे इस फैसले गी राष्ट्रीय सुरक्षा लेई खतरा ते राष्ट्रीय तोहमत करार दीता ऐ। उ'नें आखेआ कि उन्दा प्रशासन इस फैसले गी अमरीका दे सुप्रीम कोर्ट च चुनौती देग।

<><><><><><>

PM/Prez -Chambo Accident

राष्ट्रपति द्रौपदी मुर्मू होरें हिमाचल प्रदेश दे चम्बा जिले च पेश आए दे इक बस हादसे च जान मोहाने आहलें लेई गैहरा दुख प्रगट कीता ऐ। सोशल मीडिया पर उ'नें आखेआ कि इस हादसे च मारे गेदे लोकें दे परोआर आहलें कन्नै ओ दिल्ली हमदर्दी ते गैहरा दुख प्रगट करदियां ना। उ'नें घायलें दे तौले ठीक होने दी कामना बी कीती।

तोंआई प्रधानमंत्री नरेन्द्र मोदी होरें बी इस घटना पर गैहरा दुख प्रगट करदे होई आखेआ जे इस हादसे बारे सुनियै उनें'गी बड़ा दुख होआ ऐ। उ'नें मारे गेदे लोकें दे परोआर आहलें कन्नै गैहरी हमदर्दी ते बसोस प्रकट करदे होई, घायलें दे तौले नरोए होने लेई प्रार्थना बी कीती।

एह हादसा अज्ज बडुलै कोई सवा क सत बजे तीसा-बैरागढ़ सिड़का पर चालुज मोड़ कश पेश आया जिसलै ब्रेक फेल होई दी इक प्राइवेट बस सड़क पर रुलकियै हेठ इक डूंगी खड्डे च जाई पेई जेहदे कारण ड्राइवर ते कंडक्टर सनें 7 जनें दी मौत होई गेई ते 11 घायल होई गे जिंदा अस्पतालै च इलाज चलै करदा ऐ।

<><><><><><>

Korea Badminton

भारतीय बैडमिंटन खडारी अशिमता चालिहा कोरिया मासटर्स 2026 बैडमिंटन टूर्नामेंट दे फाइनल च पुज्जी गेई। अज्ज दक्खन कोरिया दे असाम च खेड्डे गेदे इक दिलचस्प मकाबले च अशिमता नै भारत दी गै रक्षिता रामराज गी 21-13/16-21/21-13 कन्नै रहाइयै फाइनल च प्रवेश कीता। खताबी मकाबला कल ऐतवारें होग- जेहदे च अशिमता दा मकाबला चीन दी चौथी नम्बरै दी खडारन हान कियानशी कन्नै होगा।

<><><><><><>

World Athletics U20

अमरीका दे यूजीन च चला रदी विश्व एथलीटिक्स अंडर-20 चैम्पियनशिप दे 3एं रोज भारत गी पैहला तगमा हासल होआ। मर्दे दी नेजा सुटने आहली स्पर्धा च आशीश यादव ने चांदी दा तगमा अपने नां कीता। 19 बरे दे आशीश ने त्री कोशिश च 74 इशारिया सिफर -9 मीटर दा अपना बेहतरीन प्रदर्शन करदे होई दुई थाहर हासल कीती। विश्व एथलेटिक्स अंडर-20 चैम्पियनशिप च तगमा जितने आहले ओह दुए भारतीय बनी गे न। एहदे शा पैहले नीरज चोपड़ा ने पोलैंड च 2016 दे संस्करण च सुन्ने दा तगमा जितेआ हा। दक्खन अफ्रीका दे जान-डेंड्रिक ने 80 इशारिया पंज-सिफर मीटर दी थ्रो कन्नै सुन्ने दा तगमा जितेआ।

<><><><><><>

Mandaviya Chess

युवा मामले दे खेड्ड मंत्री डाक्टर मनसुख मांडविया होरें आर. प्रज्ञान नंद गी उन्दा पैहला सेंट लुइस रैपिड ते ब्लिटज़ खताब जितने पर बधाई दिती ऐ। अपने इक सोशल मीडिया संदेश च मांडविया होरें आखेआ कि उन्दा शानदार प्रदर्शन ते समर्पण समूलचे मुखै लेई इक मानै आहली गल्ल ऐ, जियां जे पैहले बी खबर दिती जाई चुकी दी ऐ कि प्रज्ञान नंद 23 इशारिया 5 अंक हासल करियै इक राउंड बकाया रौहंदे गै टूर्नामेंट अपने नांS करी लैती। 22 अंके कन्नै उजबेकिस्तान दे जावो खिहिर दुई थाहर ते अमरीका दे वेस्ले सो त्रीए नम्बरै पर रेह। इस जित्त दे कन्नै गै प्रज्ञाननंद ग्रैंड शतरंज टूर दी अंक सूचि च दुए नम्बरै पर पुज्जी गेन।

<><><><><><>

Airforce –I-Day

“स्वतंत्रता दिवस” दे उपलक्ष च वायु सेना बैंड कल नमीं दिल्ली दे राश्ट्रीय युद्ध स्मारक पर अपनी प्रस्तुति देग। रक्षा मंत्रालय नै दस्सेआ ऐ जे राश्ट्रगीत “वंदे मातरम” दे 150 बरे पूरे होने दे उपलक्ष च देश भक्ति दे इस संगीतमय कार्यक्रम दा सरिस्ता कीता जा’रदा ऐ। मंत्रालय नै जानकारी दिती ऐ कि 32 वायुसैनिक ते 8 अग्निवीर वायु दी टीम एह प्रस्तुति देग। टीम च त्रै महिला बी शामिल न। कार्यक्रम दे मुख संचालक मास्टर वारंट आफिसर ए. श्रीहरि होगन। जूनियर वारंट आफिसर मून डेका, जूनियर वारंट अफसर अभिषेक पाल ते सार्जेंट एन.टी. सिंह उन्दा सहयोग देगन।

<><><><><><>

CM Pak Remarks

मुख्यमंत्री उमर अब्दुल्ला होरें पाकिस्तान दे प्रधानमंत्री शाहबाज़ शरीफ पर त्रिक्खा ज़बानी हमला करदे होई पाकिस्तान गी आखेआ ऐ जे ओहू जम्मू-कश्मीर दे अंदरूनी मामलें च दखल देना बंद करी देऐ। मीडिया कर्मिं कन्नै गल्लबात करदे होई उमर होरें आखेआ जे बजाय एहदे पाकिस्तान गी अपने गैर-कनूनी कब्जे आहले जम्मू-कश्मीर दे इलाके च मनुक्खी अधिकारें दी स्थिति बक्खी ध्यान देना लोड़चदा ऐ। पाकिस्तान दे प्रधानमंत्री आसेआ जम्मू-कश्मीर ते दफा 370 गी खत्म कीते जाने बारै दित्ते गेदे ब्यान दे परते च उमर हुं’दी एह टिप्पणी सामने आई ऐ। मुख्यमंत्री होरें आखेआ जे जम्मू-कश्मीर दे अंदरूनी मामलें च पाकिस्तान दी कोई भूमिका नेई ऐ ते पाकिस्तानी नेतृत्व गी लोड़चदा ऐ जे ओहू अपने गैर-कनूनी कब्जे आहले इलाके च मनुक्खी अधिकारें दी खलाफवर्जिं बक्खी ध्यान देन ते उ’नेंगी हल करोआने दी कोशश करन।

<><><><><><>